

SIRAH: INSAN MULIA YANG DIRINDUI

Perjalanan hidup Nabi Muhammad ﷺ siri 2

Pengenalan

Alhamdulillah, syukur ke hadrat Allah s.w.t kita masih lagi diberi peluang untuk menyelusuri sirah insan mulia yang kita semua rindui, Nabi Muhammad ﷺ. Pada siri kedua ini kita akan lebih mengetahui waktu kanak-kanak Baginda ﷺ. Semoga kisah-kisah yang diceritakan mampu meningkatkan rasa cinta kepada Nabi Muhammad ﷺ dan mengikuti sunnah-sunnah Baginda dalam kehidupan seharian kita selaku ummatnya.

Kehidupan Baginda Sebelum Diangkat Sebagai Rasul

❖ Zaman Kanak-kanak Baginda ﷺ.

Selepas Nabi Muhammad ﷺ dilahirkan, Baginda telah dihantar ke perkampungan Bani Saad untuk disusukan dan Baginda diserahkan kepada ibu susuannya Halimah Binti Abu Dzu'aib (Halimah AS-Sa'diyah). Pada waktu itu, musim kemarau melanda di perkampungan tersebut dan menyebabkan ladang tanaman dan ternakan menjadi kering. Berkat dengan kedatangan insan mulia, Rasulullah ﷺ, Allah S.W.T. telah mencurahkan rahmatNya dengan menjadikan tanaman Kembali menghijau dan kambing-kambing sarat dengan susu dan gemuk-gemuk. Itulah antara kekuasaan Allah S.W.T. yang mampu menjadikan sesuatu perkara dan menariknya kembali.

Semasa berusia 12 tahun, Baginda ﷺ mengikut bapa saudara Baginda berdagang di Syam. Rombongan Baginda ﷺ dari Makkah bertemu dengan rahib Nasrani yang digelar Buhairah kerana ilmu yang sangat luas. Ketika rombongan Baginda ﷺ menghampiri biara Buhairah, beliau mendapati setompok awan kecil mengiringi rombongan tersebut. Dalam hati rahib tersebut merasakan berdebar-debar dengan kehadiran rombongan Baginda dan mempelawa berehat di biaranya sambil menghidangkan jamuan yang lazat walaupun ini bukanlah kebiasaannya. Sepanjang masa Buhairah melihat kepada Baginda ﷺ dan bertanya, *'Siapakah namamu?'* Baginda menjawab *'Muhammad'*. Buhairah bertanya lagi, *'Ayahmu?'* jawab Baginda ﷺ *'Abdullah'* dan seterusnya *'Ibumu?'* Baginda menjawab *'Aminah'*. Jelaslah bahawa budak kecil ini adalah insan yang terpilih, lantas Buhairah memberitahu bapa saudara Baginda, Abu Talib bahawa sebaiknya kamu bawalah dia pulang kerana sekiranya orang-orang yahudi mengetahui perkara ini pasti mereka tidak akan melepaskannya.

Nabi Muhammad ﷺ telah menunjukkan kelebihan yang khusus sejak lahir lagi. Baginda ﷺ lahir dengan keadaan yatim dan hidup dalam kesusahan, sesungguhnya kesusahan inilah yang mempersiapkan Baginda ﷺ menjadi manusia agung dan penghulu bagi seluruh umat sepanjang zaman.

Kesimpulan

Rasulullah ﷺ adalah contoh ikutan yang kamil (sempurna), kita sangat beruntung menjadi ummat Baginda ﷺ kerana mampu untuk mengikut jejak langkahnya dan mengikuti sunnah-sunnahnya. Melalui kisah kanak-kanak Baginda ﷺ, Allah S.W.T. telah menunjukkan ciri-ciri insan terpilih sebelum dilantik menjadi Rasul. Kisah ini mampu untuk menyemai dalam hati kita rasa cinta kepada Rasulullah ﷺ contoh ikutan sepanjang zaman.